

PEDRONĒAN A PAIN BUÁN MIA QUIRICA

Axa bĕtsi bĕtsi menuax Jesucristomi catamĕcĕ unicama Pedronĕn quirica cuĕnĕoxuan

¹Ēx cana Pedro, aín bana unicama ñuixunuan Jesucristonĕn caísa 'ain. Mitsun nĕtĕnuax bĕtsi bĕtsi menu tsóti cuan 'aíshmi Ponto, Galacia, Capadocia, Asia, Bitinia, a nĕtĕcamanu 'icĕ cana ĕnĕ quirica mitsu buánmin.

²An sinánsabi oquin ainan 'inun ca Nucĕn Papa Diosan mitsu caísacĕxa. Aín Bĕru Ñunshin Upitan 'imicĕxmi ainanshi 'aish ax quicĕsabi oi 'inun mitsu 'imianan ca Jesucristo bama cupí mitsun 'uchacama tĕrĕnquin mitsun nuitu upí 'imiaxa. Usaími mitsux Nucĕn Papa Diosan nuibacĕx 'icĕsamaira oi chuámarua 'aish bucucanti cana cuĕĕnin.

Usai 'itia unin ñuia

³Nucĕn Papa Dios, ax Nucĕn 'Ibu Jesucristonĕn Dios 'ianan aín Papparibi, a cananuna rabiti 'ain. An ca nu nuibaquin bamaxbia baísquia Jesucristo an nun 'uchacama tĕrĕncĕxnu bacĕntĕcĕncĕsa 'aish, ainan 'inun nu 'imiaxa, ĕnĕ nĕtĕnuax ainan 'aíshnu aín nĕtĕnuribi 'inun.

⁴Nucĕn Papa Diosan ca mitsúxmi aín nĕtĕnu abĕ 'itioquin mĕníocĕxa. A nĕtĕnuax ca uisa ñubi, ĕnĕ nĕtĕnuax 'icĕsari chĕquianan cĕñútima 'icĕn, anu ca uisa 'uchabi 'aíma 'icĕn. Usabi ca xĕnibua 'aínbi 'iti 'icĕn.

⁵A nĕtĕnu 'iisama pain 'aíshmi ĕnĕ nĕtĕnuaxbi ami catamĕtia isquin ca Nucĕn Papa Diosan

aín cushínmi ñu 'atima 'aíma upíshi 'inun mitsu bërúanquin 'aquinia, an mëníosabi oími Jesucristoa utēcēncēbē aín nētēnu abē tsónun.

⁶ Acama sinani camina mitsux uísa ñu cara 'icēbēbi bēnētima cuēēnin, ēnē menu 'aish tēmēraibi.

⁷ Ēnēx ca ēsa 'icēn. Asérabi cara curishi 'icē isnuxun ca unin curi tsi rēquirucēnu xaroquin tania. Usaribiti camina mitsux caramina ami catamēcē 'ai quixun isnuxun Nucēn Papa Diosan tancē 'iti 'ain. Curi 'aishbi ca cēñúti 'icēn. Usa 'aínbi camina tēmēraquinbi Nucēn Papa Diosmi catamēquin ēncēma 'aish curisamaira 'iti 'ain. Usaquin tancēxbimi asérabi ami catamēti 'ain ca utēcēnquin Jesucristonēn —asérabi 'ēnan 'aish camina 'ēbē 'aish cuēēnti 'ai —quixun mitsu cati 'icēn.

⁸ A isúnmbi camina mitsun Jesucristo sinanin. Usa 'ain camina a isaxmabi ami sinani chuámarua tani cuēēinra cuēēnin, anúnmi uisairai caramina cuēēni quixun nu ñuixunti bana 'aíma 'aínbi.

⁹ Ami catamēcē cupí ca mitsun 'uchacama tērēncē 'iananmi ainan 'inun Nucēn Papa Diosan mitsu iēmiaxa.

¹⁰ An Nucēn Papa Dios quicē bana uni ñuixuncē unicaman ca —Nucēn Papa Diosan ca aín 'uchacama tērēanan uni ainan 'inun iēmiti 'icē —quixun cuēñeoquinbi uisai quicē cara a bana 'icē quixun 'unánma 'icēn. 'Unáncatsi quiax ñucacanánquin Nucēn Papa Diosan bana amiribi amiribi isquinbi ca 'unánma 'icēn.

¹¹ Cristo ēnē menu ucēma 'aínbi ca aín Bēru Ñunshin Upitan sinánmicē 'ixun, an Nucēn Papa Dios quicē bana uni ñuixuncē unicaman 'unáncēxa, tēmērax bamatancēx baísquitancēx ca Cristo aín Papasaribi 'Apu 'aish abē tsóti 'icē quixun.

Usaquin 'unánquin ca uisa uni cara Cristo 'iti 'icē quixun 'unántisa tanan uínsaran cara uti 'icē quixun 'unántisa tancēxa.

¹² Usai Cristo 'itia Nucēn Papa Diosan 'unánmicēxun ca atun isquinmabi, atun rēbúnqui 'ixun cananuna nun a ñucama isnuxun 'ai quixun 'unáncēxa. A bana Cristo ñui quicē, a ca a Nucēn Papa Diosan naínua xucē aín Bēru Ñunshin Upitan 'amicēxun aín unicaman mitsu ñuixunia. A bana ca ángelcamanribi uisai quicē cara quixun cuaisa tania.

Jesucristomi catamēcē uníxa usai upí 'iti bana

¹³ Usa 'ain camina Jesucristonan 'ixun upí oquin sinani ax quicēsabi oí 'iti 'ain. 'Iquin camina Nucēn Papa Diosan ca abēmi aín nētēnu 'iti mēnócēxa quixun sinani cuēēnquin Jesucristo anun uti nētē caínti 'ain.

¹⁴ Ainan 'ixun ax quicēsabi oquinshi ñu 'aquin camina bēráma Jesucristomi catamēquin Nucēn Papa Dios 'unáncēma 'ixunmi cuēēan ñucama 'atēcēntima 'ain.

¹⁵ Nucēn Papa Dios, an mitsu ainan 'inun Jesucristomi sinánmia, ax ca uisa 'uchañumabi 'icēn. Usa 'ain camina mitsúnribi añu 'uchabi 'atima 'ain.

¹⁶ Ēsai ca Nucēn Papa Diosan bana cuēnēo quia: “Ēx uisa 'uchañumabi 'aish upíira 'ain camina mitsúxribimi upíira 'inun uisa 'uchabi 'atima 'ain”.

¹⁷ Nucēn Papa Diosan ca camabi uni uisa ñu cara 'axa quixun isia. Usa 'ain camina mitsun —Nucēn Papa Dios ax ca 'ēn Papa 'icē —quixun sinani aín nētēnu 'inux ēnē nētēnu pan 'iquin ñu 'atima 'atimi racuēquin upí ñuishi 'atí 'ain.

18 Mitsun raran Jesucristomi sinánti 'unánma 'aínmi usaribi oquin sinaniabi ca Nucën Papa Diosan ainan 'inun iëmiquin mitsu Jesucristomi sinánmiaxa. Camina 'unanin, curi 'imainun curíqui 'imainun bëtsi ñucama axa cëñúti a cupíbi ca Nucën Papa Diosan mitsu iëmicëma 'icën.

19 Usama ca. Judíos unicaman aín 'ucha cupí uisaíbi 'icëma carnero aín upíira rëmia 'aínbi ca aín imi 'apati Cristo bamacë a cupí mitsun 'ucha tërénquin ainan 'inun Nucën Papa Diosan mitsu iëmiaxa.

20 Cristo ca usai 'iti 'icë quixun ca camabi ñu unioisama pain 'ixunbi Nucën Papa Diosan mënóçëxa. Usaquian mënío 'ain ca aín uti nëtë sënëncëbëishi usai 'inux Cristo ënë menu uacëxa, mitsúxmi ami catamënun.

21 Usa 'ain camina an Jesucristo bamacëbi baísqumitancëxun aín nëtënu abë 'inun 'imicë cupí ami sinanin, Nucën Papa Dios an ca aséabi ax quicësabi oquin mitsu 'imiti 'icë quixun 'unani.

22 Aín Bëru Ñunshin Upitan 'imicëx Jesucristomi catamëti ax cuëncësabi oi 'iquin axa mitsux 'icësaribiti Jesucristomi catamëcë unicamabë up-iti nuibananaxun camina ñu 'atima 'ati ashiquin ëan. Usa 'aish camina bërí 'icësamaira oi aséabi cuëenquin upí oquinra sinani atubë nuibananti 'ain.

23 Unishi 'inuan aín titan tuacë 'aish ca uni bamaia. Usa 'aínbi ca axa xëñibua 'aínbi usabi 'iti, aín bana a cuatia Nucën Papa Diosan mitsu bacëntëcëncësa 'imiaxa.

24 Nucën Papa Diosan bana cuënëo ca ësai quia:
Basix ca upí 'itancëxbi chushia. Ro uax ca upíira

'itancëxbi tiriqúi nētētia. Usaribiti ca camabi uni bamai aín upí nētētia.

²⁵ Usa 'aínbi ca Nucën 'Ibu Diosan bana xënibua 'aínbi usabi 'ia.

Ēnē banax ca—Jesucristomi catamēti ca uni Nucën Papa Diosnan 'iti 'icē —quixuan aín unicaman mitsu ñuixuncē a 'icën.

2

¹ Usa 'ain camina Nucën Papa Diosnan 'ixun ñu 'atimacama, cēmēti, uni paránti, nutsiti, unibē ñuiantanti, acama ěnti 'ain.

² Bērí bacēncē tuacën ca anun caninuxun aín titan xuma 'ati cuēēnia. Usaribi oquin camina Nucën Papa Diosan bana upí oquin 'unánti cuēēnti 'ain, ainan 'aish aín cuēēcēsabi oquin 'ai ami cushicē 'inuxun.

³ Usai 'i camina Nucën 'Ibu Diosmi sinánquin ax ca asérabi upí 'icē quixun 'unáncē 'aish aín bana 'unánti cuēēnti 'ain.

Cristo ami xubu raroti maxáxa

⁴ Usa 'ain camina axa bamatimoi tsócē, Jesucristo, a sinani ami catamēti 'ain. Judíos unían cuēēncēma 'aíshbi ca anun cuēēnquin Nucën Papa Diosan iscëx ax upíira 'icën. Unían xubu 'aquin maxax upí ami xubu raroti caíscē usaribi ca Jesucristo 'icën.

⁵ Usa 'ain camina mitsux a xubumi bucúnrucē maxáxa 'ain. Jesucristomi catamēcē 'aíshmi asaribi upí 'inun ca Nucën Papa Diosan ainan 'inun mitsu 'imiaxa. Usa 'ain camina Nucën Papa Diosan Bëru Ñunshin Upía mitsubē cupí bētsibē bētsibē nuibanani, bētsin sináncēsaribi oquin sinani achúshisa 'ain. Usa 'ixun camina Jesucristo

cupí ainan 'ixun Nucën Papa Dios cuëncësabi oquin ñu 'anan a rabianan unicama a ñucáxunti 'ain.

⁶Nucën Papa Diosan bana cuënëo ax ca ësai quia:
 'Ën cana maxax upí nancësa oquin uni achúshi, Sión cacë matá me anua Jerusalén 'icë, anua 'inun 'imiti 'ain. Unían xubu 'anuxun maxax upí ami xubu raroti caíscë usaribi oquin 'ën caíscë ca ax 'icën. Axa ami catamëcë unicaman ca isti 'icën, an ca asérabi ax quicësabi oquin atu 'aquinia quixun.

⁷ Ami catamëcë 'ixun camina mitsun anun cuëncë ñu upí sináncësamaira oquin a sinánti 'ain. Mitsux usai 'icëbëbi ca axa ami catamëcëma unicamax Nucën Papa Diosan bana cuënëo ësai quicësa 'icën:

An maxax xubuacë unían bitancëxun a cuëñquinma racáncë 'aíshbi ca a maxax bërí amia xubu cushicë 'icën, itá upímia xubu cushicë usaribiti.

⁸ 'Imainun ca Nucën Papa Diosan bana ësai quia:
 A maxáxmi ca uni raírinëx tatíqui chacáti 'icën, a maxax chami chacati ca nipacëti 'icën.
 Maxax ñui quicë 'aíshbi ca a bana Cristo ñui quicë 'icën. An Jesusan bana cuaquinbi asérabi ami catamëquin aín bana quicësabi oquin 'acëma ax ca uni maxáxmi tatíqui nipacëcësaribi 'icën. Ui unicamax cara usai 'iti 'icë quixun ca Nucën Papa Diosan bëráma 'unáncëxa.

Nucën Papa Diosnan unicama ñuicë bana

⁹ A unicama usa 'aínbi camina mitsux Nucën Papa Diosan ainan 'inun caísa 'ain. Usa 'ixun

camina ax cuëncësabi oquin 'anan aín unicama a ñucáxunin. Camina an 'imicëx upí 'aish aín uni 'ain. Usa 'ixunmi a rabiquin an 'acë ñucama camabi uni ñuixunun ca Nucën Papa Diosan mitsu ainan 'inun caísacëxa. Mitsux bërâma bëánquibucënu nicësa 'iá 'aíshbi camina bërí an 'imicëx xabánu nicësa 'ain, axa mitsubë 'ain.

¹⁰ Bërâma Nucën Papa Dios 'unáncëma 'iá 'aíshbi camina mitsux bërí aín uni 'ain. An ca mitsu nuibaquin 'aquinti 'icë quixun 'unáncëma 'icëbia Nucën Papa Diosan nuibaquin mitsun 'uchacama tërënxuan 'aish camina ainan 'ain.

Nucën Papa Dios cuëncësabi oi 'iti bana

¹¹ Ën nuibacë xucëantu, cana mitsu cain, Nucën Papa Dios mitsun 'Apu 'ain ca aín nëtëx mitsunan-ribi 'icën. Usa 'ain camina ënë menu 'aish unia aín menumabi 'icësaribi 'ain. Usa 'aish camina an-bia 'atimaquin sináncë cupía 'atima ñu 'acë uníxa 'icësaribiti 'ítima 'ain. Usa unix ca Nucën Papa Diosbë upí 'ima.

¹² An Nucën Papa Diosan bana 'unáncëma unicaman isnun camina mitsux upitax bucuti 'ain. Usaími 'ia isi ca atux an ñu 'atima 'acë uni 'acësa oquin mitsu ñui 'atimati banacë 'aíshbi mitsúnmi upí oquin ñu 'aia isá 'ixun anúan an camabi unin ñu 'acë isti nëtën Nucën Papa Dios rabiiti 'icën.

¹³ Nucën 'Ibu Jesucristomi sináncë 'ixun camina camaxunbi mitsun 'apucama ënë menua unin 'apu 'imicë, axa quicësabi oquin ñu 'ati 'ain. Amiira unicama cushicë 'apucëñunbi,

¹⁴ camina an anëcë aín unicaman banaribi tanti 'ain. Atux ca unían uisa ñu cara 'aia mëníonuan 'apun 'imicë 'icën. An 'amicëxun ca atun axa 'uchacë uni usaquin 'atëcënxunma 'anun castícania.

Usaquin 'anan ca an ñu upí 'acë unicama a nuibaquin —mix camina upí 'ai —quixun caia.

15 Mitsúnmi upí ñuishi 'ati ca Nucën Papa Dios cuëënia. Usaquinmi 'aia isi ca an Nucën Papa Diosan bana 'unáncëma 'ixun an upí oquin sináncëma unicama ax mitsumi uisaíbi banatima 'icën.

16 Mitsun upí ñuishi 'ai camina 'apucamami racuëtima 'ain. Usa 'aíshbi camina —'ëx cana camabi unin iscëx upí uni 'ai —quixun sinánquin amo cëmëanan ñu 'atima unëxun 'ati sinántima 'ain. An aséjabi Nucën Papa Dios cuëëncësabi oquinshi 'acë unisa camina 'iti 'ain.

17 Camabi uni camina upí oti 'ain. Axa Jesucristomi catamëcë unicama camina nuibati 'ain. Nucën Papa Diosmi camina racuëti 'ain. Racuéanan camina mitsun 'apu quicësabi oquin ñu 'ati 'ain.

Cristo tëmërasaribi oía aín unicamax tëmëratí bana

18 Uni ñu mëëxuncë 'ixun camina ami ñu mëëxuncë unían mi 'amicëxun 'aisama tanquinma a 'anúan mitsu cacë ñu a upí oquin 'axunti 'ain. Usaquin camina an mitsu nuibacë unishima, an mitsu nuibacëma uniribi upí oquin ñu 'axunti 'ain.

19 An ñu mëëxuncë unían upí oquin ñu mëëxuncëxunbia an ñu mëëmicë unin 'atimoquin tëmëramicëxunbi ca an uni ñu mëëxuncë unin —'ëx cana Nucën Papa Diosnan 'ai —quixun sinánquin tanshiti 'icën. Usai 'iti ca Nucën Papa Diosan iscëx upí 'icën.

20 Usa 'aínbi ca upí oquin ñu mëëiama, an mitsu ñu mëëmicë unin mitsu 'atimoquin tëmëramicëxunmi tanshitiabi Nucën Papa Diosan mitsu upí isima, mitsun 'ucha cupía usoquin

mitsu 'aia isquin. Isanan ca upí oquinmi ñu mēexuncēxunbia an mitsu ñu mēemicē unin 'atimoquin tēmēramicēxunmi tanshitia Nucēn Papa Diosan mitsu upí isia.

²¹ Usaími 'inun ca Nucēn Papa Diosan mitsu aín uni 'imiaxa. Cristonēn ca ñu 'atima 'acēma 'ixunbi mitsu cupí tēmēracēxa. Usaribi oquin camina ñu atima 'acēma 'aish tēmēraquinbi tanshiti 'ain.

²² Cristonēn ca uisa ñu 'atimabi 'ama 'icēn. 'Anan ca uisaquinbi uni paránma 'icēn.

²³ Unían ami nishquin ñu cacēxunbi ca usaribi oquin cáma 'icēn. Usa 'ixun ca unían 'atimoquin tēmēramicēxunbi uni —cana mi cupiti 'ai —quixun cáma 'icēn. Cupiti sinánquinma ca —'ēn Papa Diosan cuni ca upí oquin isquin mēníoti 'icē —quixun sináncēxa.

²⁴ Nun 'uchacama cēñucē 'aishnu amiribishi ñu 'atima 'atēcēnima, ñu upíshi 'ai tsónun ca Cristo nun 'uchacama bicē cupí i curúsocēnu bamacēxa. Mitsúxmi ñu 'atima 'ai 'insíncēsa 'aishbi upí 'inun ca ax 'aisamaira oquin paē tēnēi bamacēxa.

²⁵ Carneronēxa 'ibuñuma 'aish 'icēsari camina mitsux 'iacēn. Usa 'iá 'aishbi camina sinanati Cristomi catamēan. Amia catamēcēxuan aín 'ibun carnero bēruancēsa oquin ca an upími 'inun mitsu bērúanquin 'aquinia.

3

Usai uni aín xanubē 'iti bana

¹ Xanucama, mitsuribi cana cain, min bēnēan cacēxun cuaquin 'atimaquin sinanima camina abē upí 'iti 'ain. Usaími mitsux 'icēbē ca min bēnē, Cristo ñui quicē bana cuaisama tancē 'aishbi, min cacēxmabi upitax 'ia isi sinanati 'icēn,

2 mixmi upí sinánñu 'aish abë upí 'ain.

3 Upíira upí 'iisa tanquin camina min bu 'aisamaira oquin mëníonan, curi ñun mëníocanan, chupa cupíira cupícë pañutima 'ain.

4 Usai 'ima camina mitsux upí sinánñu 'aish bëtsibë nishananima upitishi banati 'ain. Usai 'ia isquin ca bëtsin sinánti 'icën —a xanux ca aín nuitu upí 'icë —quixun. Usai upí 'iti ax cuni ca uisa 'aíshbi cëñutima. Usai 'ími mitsux upí 'icë isi ca Nucën Papa Dios cuëënia.

5 Usairibi ca an Nucën Papa Dios cuëëncësabi oquin 'aisha tancë xanucamaxribi 'iacëxa. Nucën Papa Diosmi catamëanan aín bana cuaquin ca aín bënë quicësabi oquin 'acëxa.

6 Usaribi oquin ca Saran aín bënë Abraham cuëëncësabi oquin 'anan aín bënë 'icëbi —'ën 'ibu —cacëxa. Mitsúxribi ñu upíshi 'anan, Nucën Papa Diosmi catamëti, uisa ñu cara 'icëbëbi racuécëma 'aish camina Sara 'iásaribi 'iti 'ain.

7 Xanuñu unicamaribi cana ësaquin cain, min xanubë camina upí oquin sinani nuibananti 'ain. Axa xanu 'aish cushima cupíshima, mix 'icësaribitia ax Nucën Papa Diosmi catamëcë cupí camina a nuibaquin 'aquinti 'ain, mitsúnmi usoquin 'aia isquian Nucën Papa Diosan mitsúnmi a ñucácë bana upí oquin cuati cupí.

Jesucristomi catamëquin upí ñu 'acë cupía ax tëmëracë unicama

8 Ënë banaribi cana mitsu cain, axa Jesucristomi catamëcë uni raírinën sináncësaribi oquin sinani camina atubë nuibananti 'ain, atúxa mitsun xucénsaribi 'ain. Camina bëtsibë camáxbi nuibanani 'aquianani rabítima 'ain.

⁹ An mitsu 'atimocë unicama camina cupiquin aribi 'atimotima 'ain. Axa mitsumi 'atimati banacë unimi camina mitsúxribi 'atimati banatima 'ain. Usai 'imi bêtsibë nuibanani upitax bucunun ca Nucën Papa Diosan ainan 'inun mitsu caísacëxa.

¹⁰ Ĕsaribi ca Nucën Papa Diosan bana cuënëo quia:

Ax upitax tsótisa tancë unix ca ñu 'aisama ñui banaima 'ianan cëmëi banatima 'icën.

¹¹ Ñu 'aisama 'ati ënquin ca ñu upíshi 'ati 'icën. Nishananíma ca unibë upíshi 'iti 'icën.

¹² Usai 'iquin ca 'unánti 'icën, Nucën 'Ibu Diosan ca an upí ñu 'acë unicama bërúanquin 'aquinquin aín bana cuaquin an ñucácsabi oquin 'aquinia quixun. Usa 'ixunbi ca an ñu 'atima 'acë unicama an 'aquinima.

¹³ Mitsúnmi upí ñu 'aia isía mitsu ñui uni mimi manáncëxbi ca cëmëi quicë 'iti 'icën.

¹⁴ Mitsúnmi ñu upí 'acë cupí tëmëraibi camina Nucën Papa Diosan 'aquincëx cuëënti 'ain. Mimia uni 'icëxbi camina racuëti masá nuitutima 'ain.

¹⁵ Usai 'íma camina min nuitu mëu —Cristo ca aséribi 'ën 'ibu 'icë —quixun sinani ami catamëti 'ain. Unin mitsu —uisa cupí caramina Jesu-cristomi catamëquin abë tsoti sinani —quixun ñucácsëxun anun cati bana 'unáncë camina 'iti 'ain. Usa 'ixun camina cëruti rabíquinma upí oquinshi cati 'ain.

¹⁶ A sinani masá nuitunuxun ñu 'atima 'aíma camina chuámashi 'iti 'ain. Usaími mitsux Cristonën 'imicëx upitax 'ia isi ca an mitsu 'atimaquin ñuicë unicama —nuxnu quicë bana ax ca cëmë 'icë —quixun sinani rabínti 'icën.

¹⁷ Axa cuëencëbëa, Nucën Papa Diosan uni aín ñu upí 'acë, a cupí tēmëratí asábi 'aínbi ca an ñu 'atima 'acë cupía uni tēmëratí ax aín 'uchabi 'icën.

¹⁸ Ax upí 'aíshbi ca Cristo camabi unin 'ucha cupí achúshitishi bamacëxa, unicama ami catamëti Nucën Papa Diosnan 'inun. Uni 'aish bamatancëxbi aín namibë aín bëru ñunshin 'itëcëni baísquiax ca bëtsi 'iacëxa.

¹⁹ Cristo bamatancëx baísquicëma pain 'ixun ca anua bama unicaman bëru ñunshin sipuacësa 'icë, anu cuanxun bana ñuixuancëxa.

²⁰ Bamacëma pain 'ixun ca a unicaman Nucën Papa Dios cuëencësabi oquin 'aisama tancëxa. Noénëan aín manë nunti 'amainun ca unicama aín ñu 'atima 'acëcama ënun quixun Nucën Papa Diosan caíancëxa. Caíncëxunbia aín ñu 'atima 'acë ëncëma 'icëa aín patsan bacan cëñumainun ca 'it-samashi ocho uníxëshi manë nunti mëu atsini iëacëxa.

²¹ Nucën Papa Diosan sinánmicëxa Noé manë nuntinu 'iruax iëasa, usaribiti cananuna nuxribi Nucën Papa Diosmi catamëti 'unpaxan nashimicë 'aish iëtin. Nun namia chuañuma 'inun cananuna nashimicë 'itima 'ain. Usai 'íma cananuna –Jesucristo baísquia cupía Nucën Papa Diosan nu upí 'imicë 'aish cananuna nun 'uchacama tērënce 'aish an iscëx upí 'ai –quixun sinani nashimicë 'ain.

²² Baísquitancëx naínu cuan 'aish ca Jesucristo ax Nucën Papa Diosbë 'Apu 'aish aín mëqueu 'icën. Usa 'icë ca ángelcama 'imainun uisa cushi cara anribi aín bana cuatia.

Nucën Papa Diosan a 'anun nu 'imicësabi oquin ñu upí oquin 'ati

¹ Uni 'ixun ca Cristonën tēmëraquin paë tancëxa. Usa 'ain camina 'unánti 'ain, mitsúnribi camina — sapi cana tēmëraquin paë tanti 'ai —quixun sinánti 'ain. Uin cara Jesucristonan cupí tēmëraquin paë tanxa an ca ñu 'atima 'ai 'uchati ëanxa.

² Usa 'ixun ca axa Jesucristomi sináncëma unin sináncësa oquin sinanima Nucën Papa Dios cuëñcësa oishi 'ia, anúan bamati nëtëa 'itámainun.

³ Bëráma camina axa Nucën Papa Diosmi sináncëma unicaman 'acësaribi oquin ñunshínquin ñu 'atima 'anan paëanan, paënxun pi sharánan Nucën Papa Dios rabiquinma unían anbi sinánxun 'acë ñuishi rabiácën. Usaquin 'aquinbi camina a ñucama ëancën.

⁴ Usai 'iquinmi atubëtan ñu 'atëcëniama oquin ca unin —uisa cupí cara nubë niquinbi nu ëanxa — quixun sinánquin mitsu 'atimaquin ñuia.

⁵ Mitsu ñuiabi ca ax utëcënquin Cristonën a unicama 'imainun camabi uniribi, axa bamacëmacama 'imainun bamacëcamaribi —uisa carana ënë unicama oti 'ai —quixun isti 'icën, an 'acë ñucama 'unánquin.

⁶ Usai ca 'iti 'icë quixuan 'unánun ca bamacëma pain 'ixuan unicaman cuanun aín unicaman Cristo ñui quicë bana ñuixunia. A bana cuati Jesucristomi catamëcë 'aish ca aín unicama, camabi uni 'icësaribiti bamati 'aíshbi, Nucën Papa Dios 'icësaribiti nëtétimoi tsóti 'icën.

⁷ Anúan ënë menu 'icë ñucama cëñúti nëtë ca 'uramatia. Usa 'ain camina camabi nëtën upí oquin sinani Nucën Papa Diosbë banati 'ain.

8 'Ianan camina mitsux aséabi nishananima nuibanani upitax bucuti 'ain. Bětsi uni nuibacě 'ixun ca unin a unin 'uchacama ñuiquinma manuia.

9 Min xubunua aia camina bětsi uni biisama tani bětsi sinánquinma upí oquinshi biti 'ain.

10 Mitsúnmi raírí uni 'aquinun ca Nucěn Papa Diosan uisa ñu caramina 'ati 'ai quixun mitsu 'imia. Usa 'ain camina Nucěn Papa Diosan mitsu achúshi achúshi bětsi bětsi ñu mēēti 'anun 'imicě 'ixun mitsun ñu mēēti upí oquin 'ati 'ain.

11 Uix cara banati 'icě, ax ca Nucěn Papa Diosan sinánmicēsabi oi banati 'icěn. Uin cara raírí uni ñu 'axunia an ca Nucěn Papa Diosan cushiocěxun upí oquin 'ati 'icěn. Usoquin camina Jesucristonan 'ixun, ańu ñu caramina 'ai a Nucěn Papa Diosa cuēētanun 'ati 'ain. Ax 'Apuira 'aish cushiira 'icě ca camabi unin rabiti 'icěn, nětě xēnibua 'ańbi. Usaquin ca 'ati 'icěn.

Jesucristonan 'aish tēmēрати

12 'Ēn nuibacě xucěantu, mitsúnmi aséabi caramina Jesucristomi catamēti quixun 'unánuan bětsi bětsi ñu 'icěbě tēmēraibi camina ratuti —uisa cupí carana ěsai 'i —quix bēnētima 'ain. Camina sinánti 'ain, axa Jesucristomi catamēcě unicomax ca usari 'ia quixun.

13 Bēnēquinma camina sinánti 'ain, ami nishquian unin bětsi bětsi ocěxa Cristo tēmērasaribi oquin cananuna nunribi tēmērai quixun. Usaquin sinani camina tēmēraibi cuēēnti 'ain, usaribiti 'Apuira 'aísha Cristo aia isi cuēēnux.

14 Cristonan cupía unin mitsumi nishquin 'ati-maquin ñuicěxbi camina Nucěn Papa Diosan Běru Ñunshin Upí cushiira, axa mitsubě 'ain, cuēēnti

'ain. Unían 'atimaquin ñuiabi camina mitsun Cristo rabin.

¹⁵ Mitsua Jesucristonan cupí unin bētsi bētsi ocēx camina a sinani rabíntima 'ain. Usa 'aíshbi camina uni 'acē cupí 'ianan ñu mēcamacē cupí 'ianan ñu 'atima 'acē cupí 'ianan ñuianancē cupími tēmēracē a sinani rabínti 'ain.

¹⁶ Usaquin ñu 'acēma 'aíshbi Cristonan 'icē cupía unin tēmēramicēxbi camina rabíntima 'ain. Rabínquinma camina Nucēn Papa Dios rabiti 'ain, mitsúxmi asérabi ainan cupí.

¹⁷ An aín bana 'acē unibi ca Nucēn Papa Diosan uisai cara 'ia quixun isia. Usa 'ixun ca an aín bana cuacēma unicama aira atun ñu 'atima 'acē isquin uisaira cara oti 'icē usoquin 'ati 'icēn.

¹⁸ ¿Atux aín ñu 'atima 'acē ēnquin ñu upí 'acē 'aíshbia, aín unicama iétima 'aíshbi iēcē 'ain, cara ax ami catamēcēma 'uchañu unicama uisairai 'iti 'ic?

¹⁹ Usa 'ain camina tēmēraibi —Nucēn Papa Dios cuēncēbē cana ēsai 'i —quixun sinánquin mitsun 'acēsabi oquin upí ñuishi 'anan Nucēn Papa Dios, an mitsu unio, an bērúanun ami catamēti 'ain, an ca aín quicēsabi oquin 'ē bērúanti 'icē quixun 'unani.

5

Axa Jesucristomi catamēcē unicama 'ēsēti bana

¹ Axa Jesucristomi catamēcē unin cushicamasaribi cana 'ēx 'ain. Usa 'ixun cana atúan 'acēsaribi oquin Cristo camabi unin 'ucha cupía tēmēra, a ñuiquin bana ñuixunin. 'Anan cana atúxa 'icēsaribiti Cristo utēcēncēbē aín nētēnu abē 'iti sinanin. Usa 'ixun cana axa Jesucristomi catamēcē unin cushicama mitsu ēsaquin cain:

² Atun cushicama 'ixun camina Nucën Papa Diosan unicama bana ñuixunquin, atúxa upí nu-ituñu 'aish chuámarua buacunun 'aquinti 'ain. An carnero bërúancë unin aín carnero 'acésaribi oquin camina a unicama upía 'inun bërúanti 'ain. Usoquinmi 'anúan mitsu unin caíscë cupíshima camina asérabi 'aisa tanquin 'ati 'ain. 'Anan camina curíqui biti sinánxuinshima minbi asérabi 'aquinsa tanquin 'ati 'ain.

³ Apúxa unían ax quicësa oquinshi 'anun quiax quicësaribiti camina banatima 'ain. Usari 'íma camina mitsúnmi bana ñuixuncë unicamaxa usaribiti 'inun, upíshi 'iti 'ain.

⁴ Usoquin 'aia ca Jesucristo, unin 'acësamaira oquian an aín unicama bërúancë, an utëcënquin mitsu —asábi ca —quixun catancëxun aín nëtënuaxmi xëñibua 'aínbi abë cuëënun mitsu 'imiti 'icën. Èné nëtënuax cuaiquin canania uisa ñu cara 'ináncëxun bitsia uni cuëëncëbëbi ca an bicë ñu chëquia. Usaía uni 'icë 'aínbi camina mitsux xëñibua 'aínbi Nucën Papa Diosbë 'aish cuëënti 'ain.

⁵ Usaribi oquin cana bënëá unicama ësaquin cain, mitsun cushicaman bana camina timaquinma cuati 'ain:

Nucën Papa Dios ca unia rabíti cuëëñima. Usa 'ixunbi ca axa rabícëma unicama nuibaquin 'aquinia.

Usa 'ain camina —'ëx cana bëtši unisamaira 'ai —quixun sinanima camáxbi bëtšin sináncësaribi oquin sinani upiti 'ësëananti 'ain.

⁶ Usa 'ain camina aín bana timaima uisa ñu cara 'icëbëbi bënëtima Nucën Papa Dios 'Apuira ami catamëti 'ain. Usaími 'ia ca an anúan 'ati nëtë

ucëbëtan uisai cara 'iquin tëmëracë 'aíshbimi usai 'icëmasa 'ianan asábiira 'inun mitsu 'imiti 'icën.

⁷ Uisaquin sinani caramina masá nuituti, añu ñu sinani caramina racuëti, a ñuiquin camina Nucën Papa Dios cati 'ain, an ca mitsu nuibaquin bërúanquin 'aquinia quixun 'unánquin.

⁸ Paru 'inúan cuëëruí aín piti bari nicësa, usaribiti ca ñunshin 'atimanën 'apu, uni ñu 'atima 'anun quixun sinánmianan Nucën Papa Diosmi sinánti ënminuxun bari ñitsia. Usa 'ain camina mitsua paránti rabanan bërúancati 'ain.

⁹ Usa 'ixun camina ñunshin 'atimanën 'apúan ñu 'atima 'amitisa tancëxunbi Jesucristomi catamëquin usa ñu 'atima 'ain. Camina 'unánti 'ain, mitsu 'acësaribi oquin ca ñunshin 'atimanën 'apun, camabi menu 'icë axa Jesucristomi catamëcë unicama tania quixun.

¹⁰ Usabi 'inúxmabimi tëmëracë ca Nucën Papa Diosan mitsu cushioquin Jesucristosaribi upí 'inun mitsu 'imianan —aín bana quicësabi oi cana asérabi 'iti 'ai —quixun 'unani ami cushinun mitsu 'imiti 'icën. Ax ca an mitsu nuibaquin 'aquincë 'ianan Jesucristonan cupí abémi xëñibua 'aínbi upítax 'inun caíscë a 'icën.

¹¹ Camabi unin ca Nucën Papa Dios rabiti 'icën, nëtë xëñibua 'aínbi. Cëñútimoí ca axira cushiira 'Apu 'ia. Usai ca 'ia.

Bërúanxa 'inúan Pedronën Jesucristomi catamëcë unicama ca

¹² Nucën xucën Silvano, ax ca 'ën iscëx upiti Jesucristomi sináncë 'icën. Usa 'ain cana an mitsu buánxunun ënë quirica mitsu 'axuan. Ënë quiri-canu 'ësëanan cana mitsu cain, an mitsu upí oquin

cushionan 'aquincë cupí camina asérabi 'unánti 'ain, uisaira oquin cara Nucën Papa Diosan mitsu nuibatia quixun. A ënima camina mixmi 'icësabi oi ami upiti catamëti 'ain.

¹³ Babilonianu 'icë axa Jesucristomi catamëcë unicama, mitsu 'acësaribi oquian Nucën Papa Diosan ainan 'inun caíscë, acaman ca bërúanxmi 'icanun 'ën mitsu canun 'ë caxa. Marcos, 'ën bëchicësa, anribi ca bërúanxmi 'inun 'ën mi canun 'ë caxa.

¹⁴ Jesucristo cupí micamaxbi xucënza 'aish camina nuibanani bërúanx 'inun bëtsibë bëtsibë cananti 'ain.

Uicamax cara Jesucristonan 'icë ax chuámarua bucucanti cana cuëënin. Ashi, Pedro.

**Nukën 'Ibu Diosan ain unikama 'inan ain
bana
New Testament in Cashibo-Cacataibo
(PE:cbr:Cashibo-Cacataibo)**

copyright © 2011 Wycliffe Bible Translators, Inc.

Language: Cashibo-Cacataibo

Translation by: Wycliffe Bible Translators, Inc.

Cashibo-Cacataibo

cbr

Peru

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cashibo-Cacataibo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files
dated 29 Jan 2022

c8d73d75-386c-5f5e-a601-116dba3dae9b